



Komunidade Imprensa
Munisípiu Likisá
26 Marsu 2020

Komunidade Suku Fatumasi preokupa ho impase polítiku no kazu abandona labarik

Iha 19 Marsu 2020, JSMP realiza treinamentu ba membru konsellu suku no komunidade iha Suku Fatumasi, Postu Adminiatrativu Bazartete, Munisípiu Likisá kona-ba “Demokrásia no kna’ar orgaun soberanu, partisipasaun públiku iha prosesu halo lei no asesu ba justisa formál iha Timor-Leste. Partisipante sira ne’ebé partisipa iha treinamentu ne’e inklui Xefe suku, xefe aldeia sira, joventude fetu no mane, konsellu suku sira, profesora no polísia investigasaun ho total partisipante hamutuk ema na’in 30 kompostu hosi fetu nain 11 no mane 19.

Objetivu husi treinamentu ne’e maka atu fahe informasaun no aumenta koñesimentu ba estrutura no komunidade sira kona-ba demokrásia, knaar órgaun soberanu sira-nian, partisipasaun públiku iha proseu halo lei no asesu ba justisa formál.

“Treinamentu ba autóridade no membru Konsellu Suku sira inklui komunidade, hanesan komitmentu ida hosi JSMP ne’ebé ho intensaun atu hasa’e sira-nia koñesimentu ba asuntu importante no relevante sira, nune’e bele ajuda sira atu bele hala’o sira-nia knaar ho di’ak no hatene oinsa atu halo prosesu kazu sira tuir mekanismu ne’ebé eziste ona no ajuda sira bele trata asuntu ka problema sira ne’ebé sira-nia komunidade infrenta”, dehan Diretór Ezekutivu Interinu JSMP, Casimiro dos Santos.

Iha sesaun kona-ba demokrásia, knaar órgaun soberania sira-nian no partisipasaun públiku iha prosesu halo lei, kestaun sira ne’ebé partisipante sira foti mak kona-ba asuntu empase polítika ne’ebé to’o agora laiha solusaun, sistema demokrásia ne’ebé fó Liberdade liu ba ema, eleisaun antesipada no kestaun pesaun vitalísia. Entretantu iha sesaun kona-ba asesu ba justisa formal, partisipante sira hato’o sira nia preokupasaun sira liga ho labarik sira ne’ebé abandona hosi inan-aman, krimé violénsia doméstika ne’ebé mak akontese iha família no ikus ema seluk mak ba hato’o keixa inklui kazu omosídiu ne’ebé lahatene autór.

Hatan ba pergunta no preokupasaun sira ne’e, JSMP esplika ba partisipante sira aleinde esplika kona-ba tanbasá impase polítika ne’ebé mosu desde 2017 ne’ebé to’o agora laiha solusaun inklui signifikadu husi “Eleisaun Antesipada”. Iha relasaun ho kestaun kona-ba pensaun vitalísia, JSMP informa kona-ba advokasia ne’ebé durante ne’e halo tantu husi JSMP no parseiru sira seluk to’o ikus Parlamentu Nasionál halo mudansa ba lei refere. Iha relasaun ho krime omisídiu ne’ebé lahatene autór, JSMP esplika katak atu hatene no identifika autór bá kazu ruma, importante prezisa apoiu no kolaborasaun komunidade oinsa bele fó informasaun bá polísia nune’e bele hafasil no bele fasilita polísia sira nia servisu hodi bele identifika no suspeita ka diskunfia ema ne’ebé mak komete aktu refere. Aleinde ne’e JSMP mós enkoraza

atu ema hotu labele taúk atu koália no fó informasaun, nune'e bele ajuda polisia sira bele deskobre sé mak envolve iha aktu ne'e.

Entretantu relasaun ho abandona oan sira, JSMP esplika kona-ba instrumentu legál sira ne'ebé garantia no fó protesauun espesial ba direitu labarik nian tantu iha familia laran no Estadu no papel Ministériu Públiku hodi defende labarik sira ne'ebé sai vítima.

Kestaun kona-ba krimé violensia doméstika, iha esplikasaun JSMP subliña natureza husi krime ne'e nu'udar krime públiku ne'ebé kualkér se deit bele hato'o denúnsia no la-bele ona atu dada kazu ne'e. Aleinde ne'e esplika kona-ba objetivu husi Lei Kontra Violénsia Doméstika.

Iha sesaun abertura, Sr. Eduardo A. da Costa, Xefe Suku Fatumasi haktuir katak formasaun ida-ne'e importante tebes ba estrutura suku sira, tanba dala barak hanesan autóridade lokal bainhira akontese kazu ruma, ezemplu hanesan kazu oho malu no kazu baku malu iha uma laran, lori fali ba deputadu sira. Buat seluk mós ita nia comunidade liuliu joven sira, iha realidade tanba deit buat ida demokrásia ne'e sira halo buat ruma konforme deit sira nia hakarak, la respeita ona inan-aman no autoridade sira. Tanba konsidera treinamentu ne'e fó benifisiu tebes ba comunidade nune'e husu ba partisipante sira atu rona ho didiak nune'e bele implementa iha futuro.

Aktividade treinamentu ne'e, realiza ho apoiu finanseiru hosi Governu Timor-Leste liuhosi Fundu Sosiedade Sivil.

Atu hatene informasaun liutan bele kontaktu:

Casimiro dos Santos
Diretór Ezekutivu Interinu JSMP
Email: casimiro@jsmp.tl
Telefone: 3323883 | 77257466
Website: <http://jsmp.tl/>